



# Eallju Pohjanen voimanlähet



**UiT** Norges  
arktiske universitet

UiTs strategi mot 2030

# Eallju – pohjanen voimanlähet

UiT Norjan arktinen universiteetti oon kansoittenvälisesti johtava ja laaja-alanen universiteetti. Meän visuuni oon olla pohjanen voimanlähet. Pohjassaamen sana eallju, mikä meinaa työnankaruutta, kuvvaa UiT:n mallia olla voimanlähet. Yhtheistyössä studentitten, työteliijöitten ja muun yhtheiskunnan kansa met otama hyötypithoon meän asentopaikan Pohjas-Norjassa ja Sápmissa ja meän oman faakilisen laajuuen ja poikkietiheelisyyen nette pääsemä antamhaan oman vaikutuksen tulevaisuutheen.

Meän tehtävä yhtheiskunnassa oon antaat korkeatasasta ja tutkimapohjasta koulausta ja hommata taitheelista kehitystyötä ja tutkimusta pohjatutkimuksesta kiini kansoittenvälisen tasan käyttöietheeseen asti. Met välitämmä tietoa omista faakialoista ja eesautama innovasuunissa. Yhtheiskunnallinen tehtävä yhdistää UiT:tä läpi eri opinoitten, tutki- ma-aloitten ja isoitten geograafilisten välimatkoitten. Tämä vaatii hyvää yhtheistyötä elinkeino- ja yhtheiskuntaelämän ja kansoittenvälisen kumppanitten kansa. Met lujenamma tiethoon pohjaavaa ja kantokykystä kehitystä, niin läänillisesti, kansalisesti ko kansoittenvälisestiki.

Akadeeminen vaphaus ja tietheeliset ja tutkimaeetiliset prinsipit oon UiT:n kaiken toimen pohjana. Myötätöimiminen, myötäpäättäminen, aukeimus ja hyät prosessit oon pohja mitä tarvittemma ko tahoma tehä viishaita ja etheenpäin sihtaavia prioriteerauksia. Meän studentilla ja työteliijöilä pittää olla maholisuus kehittää omia taitoja ja potenciaalia. Seisten lujana oman tietheelisen integriteetin pohjala met piämä olla rohkeat, ankarat ja aukeinmieliset – tivhiisti faakin, ihmisten ja omanaikhaisen kehityksen ihola.

Met häyymä käyttäät resursia hyvin ja päämäärälä, ja meilä pittää olla kyky uu'istuat nette pystymä kohtaamhaan sen mitä tulevaisuus meiltä oottaa ja mitä maholisuuksia se meilet antaa. Met lujenamma meän faakialoitten ja y'intehtävitten kvaliteettia ja läpilyöntivoimaa kolmen strategisen satsausalan kautta.



# 1. Arktis ja pohjaset alat

**Mailman pohjasiimpana univeristeettina UIt oon strategisessa paikassa Arktiksen ja pohjasten aloitten kehittämistä ja tieon välittämistä varten. UIt täkkää luonon, yhtheiskunnan, teknologtiin, miljööön, kulttuurin, ihmisen ja näitten välisen yhtheispelin tutkimisen ja niitten opettamisen. Tästä kattoin met työtelemmä meren, avaruuen, illmanalanmuutoksen ja resursitten hyö'ylisen pion kansa, terveyhen ja ökonomiin kansa ja alkukansoitten, väestönmuutoksen, politikin ja pohjasen yhtheistoimen kansa. Met rakenamma meän faakialoitten ymmärykset nette saatama auttaat pohjasta sen kehittymisessä.**

**Tavotet:** Uit pittää olla kansoittenvälisessä kilvassa johtava mitä tulee tiettoon ja kompetanshiin Arktiksesta ja pohjasista aloista.

Met piämä olla parhaat mitä tulee Arktiksen ja pohjasten aloitten luonon ja yhtheiskunnan muutoksitten ja niitten vaikutuksitten ymmärtämishehen. Met piämä olla houkutteleva opiskelupaikka joka pittää arvossa ja käyttää hyöyksi faakitten, ihmisten ja käytänön toimen välistä liikeisyyttä. Met kääänämä pohjasten aloitten vaikeuet ja mahdollisuuuet faakilisiksi kysymyksiksi ja tutkima niitä yhtheistyössä.

## UIt pittää tehdä nette sauttais oman tavotheen:

- **Kehittäät useampia johtavia faakimiljööitä kansoittenvälisen tieonkasuttamisen etujoukossa.** Met otama esilet pohjasen alan kehitykset relevanttia kysymyksiä. Kehittämmä ja säilyttämmä tietheelistä infrastruktuuria ja aikasarjoja mikkä mahdollistava tieonkasutuksen Arktiksen ja pohjasten aloitten ympäri ja niitä varten.
- **Rakentaat uusia houkuttelevia koulaussuuntia mikkä sopiva pohjasen elinkeino- ja yhtheiskuntaelämället.** Met autama studentitten oppimista ja myötätulemista. Met lujitamma fleksiibelisiä opinoita mikkä varmistava ette pienten ja isoitten paikoitten niin nuoret ko raavhaatki studentit saava tietoa, kompetansia ja valmiuksia tulevaisuuen tarpheita varten.
- **Lujentaat kompetansia saamelaisten ja kväänitten ympäri ja näitä varten.** Met piämä olla johtava universiteetti saamelaisten ja kväänitten kielen, kulttuurin, taitheen ja yhtheiskunnan tuntemisessa ja välittämisessä ja majoriteetti- ja minoriteetti-yhtheiskunnan kohtaamisessa.
- **Olla Arktiksen ja pohjasten aloitten yhtheistyön voimanlähet.** Met piämä olla näkyvä ja aktiivinen tietotoimija pohjasilla aloilla ja tykätty yhtheistyökumppani elinkeino- ja yhtheiskuntaelämället ja kansoittenvälisillet yhtheistyökumppanillet.



## 2. Isot yhteiskunnalliset uhat

**Isot yhteiskunnalliset uhat** kliiman ja miljööän, ruokavaruuden, demografiaan ja terveyden suhteen näyttävä ette moderni yhteiskunta on herkkä haavottumhaan. Net näyttävä ette globaalinen yhteistoimi, demokratii ja luottamus kansoitten välilä on tähelinen. Yhteiskunta tarvittee faakimiljöitä mikkä ottava pithoon tutkimakysymyksiä ja metoodia mikkä lyhykäisella ja pitkälä sihilä saattava antaat pohjan vaativassaki päätöksenteossa. Sillä ko UiT:lä on paljon eri faakia ja se on liki luontoa ja yhteiskuntaa, sillet on maholinen auttaat tieon ja kompetansin kautta toimimhaan uutheen laihiin, sopeutumhaan ja hoksaamhaan uusia ratkasuita poikki eri faakialoitten ja elinkeino- ja yhteiskuntaelämän ositten.

**Tavotet:** UiT pittää auttaat laittamhan uuenlaisia, demokraattisia ja kantokykysia ratkasuita isoja yhteiskunnallisia uhkia varten.

Met piämä ottaat eesvastuun meän faakialoitten pohjatutkimuksesta ja olla apuna globaalisesa tietotyössä. Erilikasesti met piämä ottaat eesvastuuta semmosesta tieosta ja kompetansista mitä tarvithaan miljööstä vaarin ottavhaan, sosiaalisheen ja ökonoomilisessti kantokykysheen kehityksheen. Met piämä jakkaat meän ommaa tutkimusta ja koulaamista, tehä sen keveäksi sauttaat ja auttaat uuen tekemisessä ja yhteistyössä sekä sishäisesti ette yhteiskunnassa meän ympärillä. UiT:n studentit ja työteliijät pi'ethään tunnistaat siitä ette heillä on kyky ajatella kriitilisessti, ette het on eeläkävijät uusitten ideitten kehittämisesessä ja ette het tohtiva panna vanhaat toimitavat kysymyksen allet.

**UiT pittää tehä nette sauttais oman tavotheen:**

- **Praktiseerata aukeinta tie'että.** Met tehämä työtä sen etheen ette tutkimus, koulaus ja uusi tekeminen olis aukeinta, ja kehittämmä kenttää likheisessä yhteistyössä meän kansalisten ja kansoittenvälisen kumppanitten kansa.
- **Kehittäät tietoa, metoodia ja toimia mikkä auttava isoitten yhteiskunnallisten uhitten ratkasemisessa.** Met viemä etheenpäin ja autamma uutta tietoa ja prioriteeraama infrastruktuuria ja metoodinkehittämistä mikkä tekkee maholiseksi työn monenmukkasten probleemitten ja kantokykysten ratkasuitten kansa. Met autama kehittämhään ruijankielistä faakikieltä nette se vastaa niihin tarpeisiiin mitä Norjan työ- ja yhteiskuntaelämällä on kansoittenvälisesssä miljöössä.
- **Viä etheenpäin poikkietheelisyyttä, yhteistoimea ja uuen tekemistä.** Met laitama areenoita ja hävitämmä estheitä mitä löytyy eri faakialoitten, sektoritten ja maitten välilä. Met piämä prioriteerata ja ottaat hyötüphoon niitä maholisuuksia mitä digitaalinen uuestitoimi meillet antaa ja viä etheenpäin meän studentitten ja työteliijöitten ylheisten taioitten kehitystä.
- **Lujenamman kapasiteettia ja uuestitoimimataitoa.** Met piämä parantaat meän kykyä käyttäät hyäksi ja prioriteerata meän resursia. Met lissäämmä meän osalistumista kilphaan kansalisista ja kansoittenvälisesstä tutkimuksen, koulaamisen ja uuestitekemisen finans'eerausoorinkista.



### 3. Kyvyitten kehittäminen ja monenlaisuus

**Meän tärkein resursi on meän studentit ja työtelijät. Sillä kaikilla pittää olla mahdollisuus kehittää omaa potentiaalia nette met onnistuisima meän yhteiskunnallisessa tehtävässä. Meän studentit ja työtelijät tuleva erilaisista maista ja paikoista, heillä oon erilainen takusta ja historia, ja het tuova myötänsä omat kokemukset ja kattanot mikkä rikastuttava meitä ja vaativa meiltä. Tätä monenlaisuutta UiT pittää käyttää nette se auttaa meitä kreatiivisuutheen ja yhteishiin tavotheissiin, ja se antaa meilet pohjaa rakentaat johtavia faakimiljööitä.**

**Tavotet:** UiT pittää olla arina missä kehitethään studentitten ja työtelijöitten kompetansia ja kykyjä monenlaisuus voimanlähtheenä.

Met piämä olla houkutteleva ja sishääottava työ- ja oppimapaikka missä oon tilla kokkeila, epäonnistuat ja menestyät. Meän tapa johtaat auttaa tunnustamahaan monenlaisuuen voimaksi ja antamahaan painoa yhteisyyeet, työnankaruuetelet ja yhteistyöetelet studentitten, työtelijöitten ja muitten yhteiskunnan toimijöitten välillä. Met piämä olla kokkoova universiteetti missä kaikitten työ ja eesvastuu oon tärkeä.

**UiT pittää tehdä nette sauttais oman tavotheen:**

- **Kehittää ja houkuttaa kyvykkhäitä ihmisiä ja pittää näistä kiini.** Met laitama konstia mikkä auttava työtelijöitä ja faakimiljööitä kehittämhään omaa kapasiteettia ja kompetansia. Met hävitämmä karriereeri-estheet, meillä pittää olla täkkäävä rekryteerauspolitikki, ja met piämä systemaattisesti kehittää johtamistaitoja ja työtelijöyttä.
- **Rekryteerata ja varustaat studenttia elämänpitukaisheen oppimisheen.** Met tehämä nette liikkuvuus paranee, vahvistamma yhteistyötä työelämän kansa ja autama nette useampia nuoria siirtyä ja jääpi maanoshaan. Met eesautama tieonankaruutta, osalisuutta ja eesvastuuta tulevaisuuen eessä.
- **Prioriteerata tieon kasuttamista ja innovatiivista välitystä mikkä eesauttaa monenlaisuutta.** Met lujenamma studentitten ja työtelijöitten osalistumista dialooghiin ja yhteiskunnallisheen keskustelhuun ja puolustamma akadeemista sananvaphautta. Met piämä olla monenlaiset kompetansissa, representasuunissa ja kattanossa.
- **Kehittää etheenpäin UiT:n työ-, oppima- ja opiskelumiljööitä.** Meillä pittää olla hommmailhuun houkuttelevat ja toimivat fyysiset, sosiaaliset ja digitaaliset miljööet. Met kehittämmä itteämmä universiteettina millä oon omanlaisensa campukset ja opintopaikat.



[uit.no/om/strategi2030](https://uit.no/om/strategi2030)



**UiT** Norges  
arktiske universitet